

東

華

錄

東華錄

臣周澗蕃恭校

秋七月壬子諭大學士等二阿哥福金秉資淑孝賦性寬和作配二阿哥以來辛勤歷有年所今忽溘逝凡在內知其懿範者無不痛悼其祭文該部未敢奏請今爾等可同翰林院撰成祭文交與該部俟秋後致祭並將祭儀酌行○甲寅陝西平涼鞏昌府屬地震遣刑部侍郎李華之副都御史楊柱賑之○己未兵部等衙門議准四川巡撫年羹堯等奏喇嘛鄂穆布年扎卜向住墨裏廟係阿王滾住克之弟子原任提督岳昇龍勦撫打箭鑪之時阿王滾住克曾獻墨裏地方岳昇龍恐係拉藏所屬未准今拉藏已被準噶爾殺害鄂穆布年扎卜將所屬墨裏地方誠心投順應收納給

印於建昌邊境地方有益從之○壬戌諭大學士等發往黑龍江三姓地方之人俱因兇惡發遣人亦日多若發在一處必致生事行兇此後停其發往著發喀爾喀和卜多烏闌古木地方彼處水土甚好著築城安插令其開墾耕種八旗每佐領派護軍披甲各一名於八月內馬匹肥壯時前去駐紮彼處看守二年一換其沿途驛站甚屬緊要每站應豫備車輛毋致犯人勞苦著交與議政大臣會同九卿議奏○總督額倫特奏臣先經與侍衛色楞商議穆魯斯烏蘇河水方漲未易過渡探知多倫鄂羅木地方有七叉河可渡色楞統兵先去臣於此間擇水草好處稍習兵馬隨後趕行六月十八日臣統兵自穆魯斯烏蘇起程至圖爾哈圖駐紮見河水雖深中流甚緩因製造皮船於三日內兵馬齊渡至七叉河處跟尋色楞並無兵馬渡河蹤迹路遇運米回子達爾漢白克告

云運米未到之先遣人尋向色楞通知其人自七叉河過去六日
杳無消息近聞色楞自拜圖地方前往等語但自七叉河至拜圖
山嶺險峻無路可通若將兵馬調回改趨拜圖之路往返須二十
餘日勢難與色楞同路臣於六月二十四日自七叉河向庫庫塞
一路進兵沿途整肅行伍遠設哨探若與賊兵相遇則奮力剿滅
若前至博克沙克遇見色楞之兵則會同前進報聞○甲戌禮部
等衙門議覆左都御史蔡升元奏 皇上親閱河隄指示方略淮
黃底定漕運無虞商民永賴至於 翠華時巡察吏治訪民俗諮
問必周芻蕘必納 聖德神功洵可爲萬世法恭請編纂省方盛
典一書以光郅治應如所奏設局纂修從之○是月免安徽沛縣
上年水災賦有差

八月辛巳諭大學士等覽廣東巡撫法海請安奏摺語意異常似

病瘋顛去歲 皇太后升遐並不摺奏請安豈彼時未聞朕躬欠
安耶又聞伊病噎膈總不出見一人九卿眾大臣以爲何如著問
明議奏○壬午索倫水災遣官賑之○刑部等衙門議奏鑲藍旗
逃棍孟光祖捏稱誠親王差遣經歷各省誑騙財物應凌遲處死
得旨孟光祖著改卽處斬○戊子 上行圍發熱河○庚寅增置
成都府四川駐防滿洲兵○壬辰以楊宗仁爲廣西按察使原任浙江
按察使○甲午禮部尙書宗室鎮國公吞珠卒賜鞍馬二匹散馬二
匹銀二千兩發引時遣皇五子恆親王允祺往送尋予祭葬立碑
謚恪敏○乙未吏部等衙門議覆左都御史蔡升元條奏五款一
督撫參處郡縣之本章有可裁省者如交代遲延承緝不力承追
不力俱不必具本奏參各照定例咨明各部處分該部彙奏完結
一督撫審擬案件有宜駁正者如所引律例不符或前後情詞互

異經部院衙門駁回令其詳審該督撫恐承審各官有失入失出之罪伊等亦涉蒙混之愆遂始終徇庇不卽改正嗣後部駁再審事件該督撫務虛心細按律例將舛錯處卽行改正具奏其承審官從前錯擬免其議處若始終不行改正令該部院衙門提取全案覆覈改正將承審各官及該督撫並交部議處一六部侍郎開列之例有應盡一者查吏部侍郎有一兼學士銜者缺出開列禮部左右侍郎內閣學士翰林院掌院學士講讀學士正少詹祭酒共十七員有一不兼學士銜者缺出開列戶兵刑工四部侍郎副都御史共十員又禮部左右侍郎缺出開列內閣學士翰林院掌院學士講讀學士正少詹祭酒其戶兵刑工四部侍郎缺出開列副都御史宗人府府丞通政使大理寺卿是由翰林院出身者以十五員而升兩缺由京堂出身者以五員而升入缺不無稍偏嗣

後凡遇有六部侍郎缺出不論翰林京堂應升官員通行開列一
刑部罪輕之犯有宜從寬者查拏送人犯到當月司官處卽行收
監因案內人犯提拏不齊遂致遲延時日直至審結擬罪方彙奏
發落此等輕罪人犯久禁獄中似屬可憫嗣後部中監犯凡徒罪
以下不必監禁獄中交與該佐領及地方官保出候審俟刑部審
結具題後卽行發落一五城兵馬司之奉行牌票有宜禁飭者查
五城司坊官拘拏人犯差役紛繁究其所奉牌票衙門甚多嗣後
五城司坊官奉行牌票除提督及部院堂官通政使司大理寺堂
官順天府府尹本城御史批發事件外其各衙門不得擅行牌票
交與司坊鎖禁人犯均應如所請從之○刑部等衙門會審革職
浙江黃巖總兵官仇機潛住京師譌詐官民罪款昭著應將仇機
照光棍爲首例斬立決從之○福建浙江總督覺羅滿保奏參浙

江黜革舉人陳鳳墀科場作弊一案察審陳鳳墀供連正主考索泰請差部院堂官往浙江審理得旨著禮部左侍郎王思軾大理寺少卿金應璧前往會同該督嚴審定擬具奏○庚子諭大學士等聞今年安徽所屬地方出蛟發水甚是傷民前日曹頰家人來奏晴雨錄詢問是實總督巡撫雖未啟奏朕既聞知心切軫念京中有安徽地方官員著九卿速行問明

閏八月丙午朔總督額倫特奏七月十六日臣等自門贊西里克起程至齊諾郭爾安營十七日四更賊兵衝偪營盤臣卽遣遊擊王汝載等率兵進擊賊眾大敗賊人又自東自南齊進臣親統弁兵與賊對敵槍礮並發自寅至巳賊敗下山坡臣等追擊十餘里見賊兵多而官兵少四面山溝俱有可通之路恐有埋伏未曾窮追所獲被傷一賊訊稱賊酋托布齊杜喀兒二人率兵四千由喀

喇烏蘇河西小路而來臣卽移咨公策旺諾爾布統兵速來接應臣仍相度機宜渡過喀喇烏蘇前往狼臘嶺若與色楞相遇則會兵前進儻不相值再隨機而行得旨據奏大敗厄魯特賊兵傷殺甚多等語額倫特率領兵丁頗少直抵從古未到之絕域奮勇直前建立膚功殊非尋常軍功可比見今賞賚軍前人等家屬外事定後著從優議敘○侍衛色楞奏唐古特人等原係達賴喇嘛所屬之人自去年被厄魯特賊眾奪其牲畜擄其婦女擾害難堪是以晝夜懸望大兵救援一聞大軍前至莫不歡躍投誠爲首台吉卓里克圖之子博音馬松台吉丹津綽音達克等率眾來降但臣未知額倫特由何路進兵因將新滿洲侍衛諾里爾達等派出令投誠之沙克扎寨桑爲嚮導前往偵探額倫特信息今已得回文臣在喀喇烏蘇候伊來到合兵一處前進達穆地方下所司知之

○丁未侍衛色楞奏七月二十日臣等統兵至喀喇烏蘇安營二十一日隨據新降台吉博音馬松等報稱見在厄魯特賊人在伊地方勒索口糧謀擊我兵臣卽率領滿洲綠旗兵丁分列三隊前往截殺賊眾衝抵我師分道夾擊連敗之奪其三處山梁賊兵竄走臣隨統兵追殺二十里斬戮賊兵三百餘人受傷者甚眾得旨該部從優議敘○戊辰諭戶部三年以來因策妄阿喇布坦狂逞跳梁發遣大兵屯駐西邊一切征繕皆用正賦不使累及閭閻而轉輸輓運秦民勞苦急公又莊浪等處地震寶堪憫恤其陝西甘肅明年地丁稅糧俱行蠲免歷年逋賦亦盡除之

九月丙子朔添設蒙古旗分御史二六部郎中六員外郎八主事六○己卯令都統阿爾納總兵官李耀等帥師往噶斯柴旦木駐防○壬午 上還熱河○癸未以杜爾伯特被災遣官賑濟其逃

亡自鬻者發帑贖還之○丙戌以王頊齡爲武英殿大學士兼工

部尙書陳元龍爲工部尙書

由廣西巡撫遷

○以渣克旦爲兵部左侍郎

由內閣學士遷

○己丑理藩院議奏青海貝勒戴青和碩齊察罕丹津等

來朝請安應照例賞資鞍馬銀幣得旨察罕丹津當人心疑懼之

際委身效順甚屬可嘉著封爲多羅郡王○甲午 上自熱河回

鑾○甲辰 上還京師○先是總督額倫特同侍衛色楞俱統兵

至喀喇烏蘇與賊眾遇屢敗賊眾相持月餘至是復率兵進擊射

死賊人甚眾矢盡額倫特猶力戰歿於陣○是月免甘肅涼州古

浪等五衛所旱災額賦有差

冬十月乙巳朔諭大學士等今見管佐領一二世後卽爭告以爲

原管佐領不知入旗內原管佐領甚少初起有帶來人丁賜給佐

領者方可稱原管佐領若祖父傳至子孫所管佐領止可稱爲世

管佐領豈可稱為原管佐領耶爾等會同該部查議具奏○丙午

以貝和諾為禮部尚書

由盛京工部侍郎遷

轉王景曾為戶部左侍郎以李

永紹為戶部右侍郎

由宗人府丞遷

○王子以阿克敦德音額黑納俱

為內閣學士

阿克敦由詹事府學士遷

○癸丑以覺羅蘇庫為盛

京工部侍郎

由左副都御史遷

○甲寅諭吏部考試月官令作八股時文

大都鈔錄舊文苟且塞責嗣後不必作八股時文止令寫履歷以

三百字為限觀其書法妍醜文理工拙則人之優劣自可立見矣

○諭刑部凡人命事朕必各案詳看方肯完結此次朝審情實各

案朕欲一一詳看覺精力不支若俟從容看過再行批出則該部

必照例覆奏三次冬至以前總不能結前數年俱曾停決今年亦

著停決○丙辰命皇十四子固山貝子允禩為撫遠大將軍○庚

申先是議政大臣等奏請派出之兵由何路發往奉旨往西安一

路爲第一起往甯夏一路爲第二起往宣府大同神木榆林沿邊
一路爲第三起至是奏請出兵日期 上命護軍統領吳世巴委
署護軍統領噶爾弼帶領第一起兵於十一月十五日起程駐紮
莊浪副都統宗室赫石亨寶色帶領第二起兵於十一月二十九
日起程駐紮甘州撫遠大將軍允禴帶領第三起兵於十二月十
二日起程駐紮西甯各於駐紮處喂養馬匹○壬戌禮部議覆故
雲南貴州總督甘文焜值吳逆之變不屈殉節故山西汾州府知
府黃庭柏值逆賊姜瓖叛亂罵賊殉節應各建祠本處載入祀典
從之○癸亥賜封榮九等一百十名武進士及第出身有差○甲
子諭議政大臣等四川巡撫年羹堯自軍興以來辦事明敏又能
度量西去進剿之兵會同青海公丹仲之人運食物米糧接濟殊
屬可嘉從前四川地方亦曾設總督年羹堯係巡撫止理民事無

督兵責任見今軍機緊要將年羹堯授爲四川總督如明年大兵前進則由松潘一路進發而在成都駐紮之滿洲兵止有二千爲數甚少將荊州之滿洲兵再派一千前往成都駐紮豫備此滿洲兵俱令都統法喇管轄所派一千兵之缺著挑選餘丁一千名令其披甲充補○諭吏部部院衙門滿洲官員旣在侍衛班行走漢官每遇奏事派六員引見科員及御史無論巡城與不巡城奏事日令派出滿洲三員漢人三員侍班翰林亦派出五員侍班此侍班人員內如有不得來者不妨聽其缺少其數不必補足如此朕於伊等皆可認識矣○乙丑發盛京倉糧賑扎賴特貝子特固斯旗○丁卯命四川總督年羹堯仍管四川巡撫事改陝西四川總督鄂海爲陝西總督○戊辰 上幸湯泉○庚午諭議政大臣等十四阿哥旣授爲大將軍領兵前去其纛用正黃旗之纛照伊王

蘇式樣簡親王之子永謙令其帶伊父之纛前往將上三旗侍衛
添出三十員莊親王之護衛既於一切之處俱不行走如其護衛
並親軍中有情願告往效力者爾等親加揀選奏聞宏昉屬下之
人亦著照此凡有子弟出兵之王等外其不出兵之王等亦令各
選護衛三員貝勒貝子各二員公等各一員隨十四阿哥前往效
力步軍協領愛哈那行走熟諳令其統轄王等之護衛前去尋將
王等護衛散騎郎典儀共三十六員親軍校四員親軍二十六名
開列具奏報聞○轉李永紹爲戶部左侍郎以王企靖爲戶部右
侍郎革職刑部右侍郎○諭議政大臣等每旗都統副都統或有起家微
賤專意徇庇一應補授官員並佐領等事恆有遲至數年或十年
不奏者或一官病故已久數年尙仍給俸者一切事件漫不稽察
甚是曠廢近聞都統石文英不出門戶亦不見人有事來奏每不

俟事畢止圖早歸亦不瞻仰朕容甚屬不堪見今正藍旗滿洲都統延信前往出兵其滿洲蒙古漢軍三旗之事著七阿哥辦理正黃旗滿洲都統巴賽署黑龍江將軍事務其滿洲蒙古漢軍三旗之事著十八阿哥辦理正白旗滿洲都統和禮差往雲南其滿洲蒙古漢軍三旗之事著十二阿哥辦理如此則別旗各相效法自必發憤勤事也○壬申戶部等衙門議准廣東巡撫法海奏廣東鹽務關係緊要不可無專轄之員請仍遣御史一員會同撫臣督徵從之○甲戌都統延信等奏八月二十一日土司楊如松率領兵丁五百名解送糧餉至穆魯斯烏蘇遇準噶爾賊人將千把總三名兵丁四十八名傷害楊如松等衝突而出今具呈情願效力行走又土司陸華齡祁顯邦率伊土兵前赴軍前經今數月求指示效力行走因令楊如松駐紮那蘭撤蘭陸華齡等駐紮古木查

拏賊寇其被賊傷害之千把總及兵丁俟查明議奏從之○都統和禮等奏據鶴麗總兵官趙坤稱閏八月初四日有磔巴達節屬下之彭蹴達幾及伊跟隨之人九名潛至中甸貿易磔巴達節係投順策妄阿喇布坦委爲藏內副王之人是以將彭蹴達幾拘住看守請示作何發落等語特疏奏聞得旨彭蹴達幾著解來京

十一月丙子 上還駐暢春園○丁丑九卿遵旨會議廣東巡撫

法海患病噎膈不勝封疆重寄應將法海革任從之○戊寅以景

日昡爲禮部右侍郎

由左副都御史遷

○乙酉以楊宗仁爲廣東巡撫

由廣

西按察使遷

宜思恭爲廣西巡撫

由河南布政使遷

○福建浙江總督覺羅滿

保奏福建巡撫陳瓚病故得旨陳瓚居官甚優操守廉潔清官朕亦見之如伊者朕實未見恐古人中亦不多得也前在臺灣道任內所應得銀三萬兩並未入己俱於修理礮臺等公事動用署總

督印務時應得銀兩亦未沾染前來京陛見曾奏稱貪官不在所取之多寡取一錢卽與取千百萬金等必一錢不取方可謂之清廉人所以貪取錢財者皆因艱於用度臣曾任縣令便不至於窮苦卽不取一錢衣食亦能充足等語今觀其居官實能踐所奏之言誠清廉中之卓絕者似此不加表揚賜卹何以示勸著追授禮部尙書凡祭葬立碑予諡之處皆照尙書銜給予並廕一子入監讀書以示朕優禮清廉大臣之意○丙戌以屠沂爲左副都御史

由奉天府府尹遷

○己丑

上以西征大兵起行詣

堂子祭旗纛○癸

巳禮部左侍郎王思軾等奏臣等遵旨會審浙江黜革舉人陳鳳輝科場作弊一案據陳鳳輝供翰林院侍講學士陳恂同伊子候選知府陳鈺在正考官索泰處通關節應將陳恂陳鈺革職嚴審從之○丙申諸皇子諸王大臣等議奏去歲大事時臣等親奉

諭旨大學士等恭上 皇太后尊諡將章字遺寫 皇太后係朕
嫡母日後神牌升附 太廟 奉先殿應安奉於 慈和皇太后
神牌之上伏惟 皇上至孝超邁千古凡典禮攸關無不敬謹周
詳茲恭請 孝惠章皇后神牌應供在左 孝康章皇后神牌應
供在右請交與禮部改正得旨是○戊戌諭大學士等朕從前屢
諭諸臣及科道官員各省有應行奏聞事件隨聞隨卽繕摺具奏
非令其糾參不過欲知之早耳朕雖聞之亦不卽聲明或未詳確
亦不卽治罪也卽如去年河南兇犯亢珽等擾害地方妄行不法
朕偶有所聞卽特頒諭旨遣大臣拏獲審結今歲聞江南地方起
蛟卽傳諭詢問陝西地震卽差大臣散賑彼處人民咸謂 皇上
注念小民加意軫恤少有災異卽便施恩不令失所近日湖廣地
方有奸宄之徒捏造妖言煽惑愚民放火劫掠曾經總督滿丕奏

聞朕卽諭令審結此皆因朕聞知方傳旨遣人如無所聞何由降旨料理耶且各省兵丁空糧甚多康熙五十二年大賞天下兵丁時曾諭散賞諸臣逐一按名散給其遣往諸臣因不認識兵丁不能清查頂冒以致所有空糧隱匿尙多不獨遠省爲然卽直隸近處空糧亦不勝數豢養兵丁特爲備用而設平時將空缺之兵不行補足不行訓練及臨時欲用縱有募補之兵累萬亦何濟乎此事朕甚慮之前歲朕聞往呂宋噶囉吧之人甚多恐其生事曾諭查明作何設法令回內地自從議奏之後聞於來船附回者頗眾此係外洋於內地毫無關涉而朕畱心訪詢者並無他故不過欲知地方情形人數多寡以便整理耳且各省文官私派加耗武官空糧等事朕頗得聞知則人皆畏懼可以悛改於事大有裨益此等有關地方事務及官員賢否諸臣何嘗不知卽鄰省大吏亦未

嘗不知或係師生親友或係同年或因子弟親戚在伊省居官故彼此相隱不以上聞何以妨微杜漸嗣後九卿大臣科道官員凡有關地方事務及官員賢否有聞卽繕摺具奏若所聞未確不妨卽以所聞未確之處一併聲明可傳諭九卿○諭各省監禁緩決及秋後處決人犯甚多已經緩決斷不致死將來仍然得釋與其久禁獄中不如分別完結爲善爾等會同九卿將此等人犯情罪作何分別完結之處詳加確議具奏再被毆受傷至保辜限外身死部內奏明緣由請旨定奪者無庸議外有當時不曾殞命逾數日或因傷風或因他病而死仍將毆打之人議抵情有可矜此等向未有定例亦會同九卿確議定例具奏○辛丑諭滿漢文武大臣等今歲 皇太后梓宮奉安地宮朕以兩足疼痛未得親送今必親自謁 陵致祭以盡思慕之意爾等毋得勸止○壬寅以呂

猶龍爲福建巡撫

由原任湖北布政使遷

劉廷琛爲廣西按察使

由浙江糧道遷

○

是月免湖北鍾祥等十二州縣武昌等七衛旱災額賦有差

十二月丙午以平欽元爲河南布政使

原任湖北布政使

○己酉撫遠大

將軍允禔師行○丙辰

上謁

陵啟鑾○庚申

孝惠章皇后

神牌升祔

太廟頒詔天下舉隱逸恤困窮罪非常所不原者咸

赦除之遣官祭嶽瀆長白山醫巫閭山及歷代帝王陵寢先師闕

里○壬戌

上謁

孝東陵旋謁

暫安奉殿

孝陵○癸亥吏

部議准雲南巡撫甘國璧奏撒甸苗人傾心歸順地方遼闊請將

武定府同知移駐撒甸分防治理從之○乙丑予故福建巡撫贈

禮部尙書陳瓚祭葬諡清端○予故漢軍都統馮國相禮部右侍

郎胡作梅河南巡撫鹿祐祭葬○己巳

上還京師○辛未冊封

博爾濟錦氏爲

宣妃和嬪瓜爾嘉氏爲

和妃達甲氏爲成

妃瓦劉哈氏爲 定嬪王氏爲 密嬪陳氏爲 勤嬪○是歲朝鮮琉球安南來貢○人丁戶口二千四百七十二萬二千四百二十四又永不加賦滋生人丁二十五萬一千二十五田地山蕩畦地七百二十五萬九百一十一頃九十畝有奇徵銀二千九百九十九萬四千五百六十二兩有奇米豆麥六百八十九萬三千五百十五石有奇草四百四萬八千二百七十五束茶二十五萬三千四百二十七引行鹽五百十萬二千三百七引徵課銀三百七十六萬一千二百五十五兩有奇鑄錢四萬一千三百二十六萬八十八百有奇

東華錄

康熙一百三

臣王先謙敬編

臣周澍蕃恭校

康熙五十八年己亥春正月甲戌朔日有食之○己卯諭大學士九卿等日食雖係一定交限可以推算且今歲元旦日食被陰雲微雪未曾得見但別省無雲之處必有見者況日值三始人事不可不謹或有缺失之處諸臣應商酌確議向來京師地方聞有地震今歲至夏秋時或稍地震亦未可定也○癸巳兵部奏河南南陽總兵官高成標下兵丁將知府沈淵帶至教場陵辱一案其差往審理之部院堂官開列請旨伏候 欽點得旨著刑部尙書張廷樞內閣學士高其倬前往審理○乙未 上幸湯泉○庚子上還駐暢春園○辛丑諭議政大臣等有本人立功授職後因年

老或染病解任襲與兄弟子姪承襲之人若經病故卽不准承襲立功之人見在而遽謂承襲世次已完不准襲職殊屬可矜嗣後立功授職之人本身若在理宜再准承襲一次爾等會議具奏尋議立功授職之人其承襲世次已完而本人見在者令將願與承襲之人准其承襲若無應承襲之人仍令本人支給全俸永著爲例從之○壬寅命截畱江西湖廣漕米四十三萬石分貯蘇州鎮江江甯淮安安慶備荒

二月乙巳 上巡幸畿甸啟鑒○壬子命內閣中書鄧廷詒翰林院編修成文諭祭故安南國王黎維正並封嗣子黎維禡爲安南國王○甲寅諭內閣學士蔣廷錫皇輿全覽圖朕費三十餘年心力始得告成山脈水道俱與禹貢相合爾將此全圖並分省之圖與九卿細看儻有不合之處九卿有知者卽便指出看過後面奏

尋九卿奏稱從來輿圖地記往往前後相沿傳聞傳會雖有成書終難考信或山川經絡不分或州縣方隅易位自古至今迄無定論我皇上以生知之聖殫格致之功分命使臣測量極度極高差一度爲地距二百里晝夜之長短節氣之先後日食之分秒時刻都邑之遠近方位皆於是乎定天道地道兼而有之從來輿圖所未有也南北兩大幹一幹自崑崙東北歷西番境至興安嶺達於盛京南折入朝鮮境入海一幹自崑崙東南歷雲貴廣西湖廣江西境或東或北折至閩浙入海凡兩幹以南以北之水大則名川靈瀆小則泉澗溪潭莫不順山脈以分流隨地形而轉下縈回盤帶刻鏤繡錯而尋源溯委條貫井然從來輿圖所未有也關門塞口海汎江防村堡戍臺驛亭津鎮其間扼衝據險環衛交通荒遠不遺纖悉畢載星羅碁布櫛比鱗次從來輿圖所未有也東南

東北皆際海爲界西南西北直達番回諸部以至瑤池阿耨絕域之國黃流黑水發源之地皆琛寶所賓貢版輿所隸屬舉其土壤驚爲勑見之名溯厥道塗卽可按程而至以六合爲疆索以八方爲門戶幅員該廣靡遠弗屆從來輿圖所未有也 皇上精求博考積三十年之心力覈億萬里之山河收寰宇於尺寸之中畫形勝於几席之上臣等荷蒙 皇上教思不倦得以瞻仰披尋昔會經過之區宛然阡陌素所未歷之境不啻鄉閭而於禹貢所書古今圖誌所傳平日有迷莫指有惑莫祛者一旦豁然貫通渙然冰釋此誠開闢方員之至寶混一區夏之鉅觀昭揭日月而萬世不刊者也謹將原圖恭繳伏求頒賜得旨圖著頒發○丙辰予故原任吏部尙書馬爾漢祭葬○庚申 上還駐暢春園○壬戌靖逆將軍富甯安遵旨議覆烏闐烏蘇四面皆山地方狹隘不便修城

多駐兵丁有庫庫車爾地方周圍遼闊離烏闌烏蘇不遠應在庫庫車爾左近有水草之處修築城池駐兵二千名派大臣二員管理鄂龍吉噶順喀桃等處俱修築堡子各駐兵一千名每處各派大臣一員管理約洛圖烏闌烏虎爾渣圖二處離噶順喀桃不遠亦修築堡子各駐兵五百名庫爾麥圖地方亦修築堡子駐兵三百名俱令侍衛及副將等官管理以上諸處俱不產木料應修築土堡每堡相間之處修築烽墩酌量安兵令其瞭遠傳送信息其庫庫車爾等處與巴爾庫爾相間有三百里應酌量派兵在見設汛界之敖什希投濟等處安營以爲應兵大兵照常駐紮巴爾庫爾自吳爾圖海畢爾汗一路至庫庫車爾鄂龍吉共安設六站臣親身帶領大臣侍衛前往庫庫車爾等處將何處可以修築城堡烽墩如何展設汛界安設臺站並牧放牲畜之處逐一詳視後一

面修築城堡烽墩一面令兵駐紮下議政大臣知之○甲子禮部等衙門奏古來帝后有不合葬而自爲陵者俱就方位定名今孝惠章皇后陵卽在 孝陵之東不必另立陵名臣等恭擬 孝東陵字樣仰候 欽定得旨是○乙丑予故原任領侍衛內大臣公舅舅佟國維祭葬○辛未議政大臣等議覆都統法喇等奏裏塘地方與打箭鑪甚近若遣官招撫自當歸順巴塘民心亦與裏塘相似遣官一員先至裏塘宣示威德彼若傾心向化卽令開造地方戶口清冊繼至巴塘亦照此行若有觀望不前者於青草生時以兵臨之必不敢相抗應挑選成都滿兵五百名令協領等帶領綠旗提標兵一千名化林永甯兵五百名令永甯副將等帶領一同深入雖巴塘以外亦可傳檄而定若又木多地方亦來歸順則離藏甚近其會兵取藏之處一面知會西甯雲南領兵大臣仍

一面星夜請旨應如所奏令法喇領兵赴打箭鑪駐紮遣人招撫其護軍統領溫普應調取回京成都既有滿洲兵丁應自京城派大臣一員前往成都令其管領得旨軍前大臣甚多著派護軍統領噶爾弼就彼馳驛作速前赴四川與年羹堯一同辦理軍務法喇離打箭鑪切近卽令領兵前往餘依議○癸酉議政大臣等議覆都統法喇奏蒙古地方及西藏人民皆藉茶養生賊人卽踞藏地非茶斷難久居我皇上憫念青海與裏塘巴塘人眾非茶難以度日將作何定數分晰禁止之處令臣等詳議臣等思唐古忒之人亦皆爲賊所迫脅難禁其養生之物但松潘一路茶價甚賤青海一帶積茶必多應暫行嚴禁俟其懇請時再酌定數目令其買運至打箭鑪外最近者爲裏塘遣官招撫令營官造其所管番寨戶口清冊酌量定數許其買運巴塘以外亦照此例其打箭鑪

一路當視番情之向背分別通禁應如所奏從之

三月乙未議政大臣等議覆撫遠大將軍允禔奏參吏部侍郎色爾圖奉旨料理西甯兵餉並不實心辦事任意遲延推諉縱令家人與筆帖式戴通包攬運米之事通同扣剋銀兩將滿洲綠旗兵丁苛刻情殊可惡請將色爾圖等嚴審確擬再色爾圖虧空甚多糧餉事關緊要伏乞另派賢能大臣一員前來辦理應如所奏將色爾圖嚴審定擬見今巴爾庫爾有巡撫綽奇噶什圖二人應將噶什圖調赴西甯辦理糧餉事務噶什圖所辦之事令前往種地之侍郎海壽兼管從之又議覆允禔奏參都統胡錫圖領兵來時沿途索詐官吏騷擾百姓進藏之時兵無紀律糴米不行節省馬畜不行愛惜以致人馬傷損同時不親自率領兵丁先行進口請將胡錫圖革職嚴審應如所奏從之○庚子封青海貝勒察罕丹

津爲多羅郡王

夏四月乙巳議政大臣等議覆撫遠大將軍允禔奏據都統延信等稱準噶爾與青海之人聯姻已經多年大將軍若領兵出口外我兵所出之多寡青海人等一知則準噶爾之人卽得聞之矣今年暫且停兵不進則口外駐紮似可不必又據自喀喇烏蘇回來之參將述明等稱準噶爾賊眾雖與我兵交戰亦甚畏懼其土伯特之人爲賊所迫雖與我兵對敵俱將鳥槍舉高放過當賊人背後則向我等營中放空槍揆此則可知土伯特之人實心感戴皇恩今旣揚稱三十萬大兵進剿差使前往大事可成謹將伊等報明之處奏聞請旨查都統延信等旣稱大兵不必出口應令在西甯駐紮至於作何料理駐紮以及畱兵若干所畱官兵馬匹於何處牧放等事俱令大將軍酌量而行從之○庚戌免甘肅所屬

歷年通賦○辛亥諭大學士九卿詹事科道朕臨御以來一切機務必皆躬親從不敢稍自暇逸但少壯時精力有餘不覺其勞今氣血漸衰精神漸減辦事殊覺疲憊寫字亦手漸顫仍欲如當年事事精詳則力有不能若草率辦理此心又所未安從來書生論歷代帝王多指摘過失謂其安享富貴耽於逸樂朕披閱史書歷觀古來帝王因深知爲君之難卽朕六十年宵旰勤勞雖金石爲質亦應消耗況氣血之身乎又於詩文一事皆出朕心裁內書房翰林輩不過令其校對謄寫耳見今在位大臣年老者大約與朕年相仿衙門辦事不過一二時辰卽可歸寓安息有疾亦可告假且有託病偷安者同列與司屬豈能強之入署乎如舊年考試武進士趙申喬在朕前睡去侍衛屢次喚醒朕前尙且如此在衙門辦事時可知矣今天下大小事務皆朕一身親理無可旁貸若將

要務分任於人則斷不可行所以無論鉅細朕心躬自斷制早夜焦勞而心血因之日耗也但年力雖衰而志意始終如一仍未敢少懈自朝至於日昃坐臥起居會無片晷餘閒勉強支持心勞力竭爾諸臣曾無一人爲朕黽勉抒誠者或有不肖之徒見朕精神氣血漸不如前因以爲奸亦未可定此諸臣俱應畱心者也朕前冬曾有諭旨爾諸臣未必記憶理應不時省閱今部中之事錯誤亦有如恩詔援赦刑部逐件具奏殊非舊例部院衙門如此類頗多朕欲不悉心詳閱得乎又如總督鄂海奏請蠲免甘肅米石草束章奏甚長朕字字細覽所擬票籤錯誤朕會刪改批出總之諸臣徒事虛文見朕躬煩勞不過云皇上理宜靜養似此皆如畫餅有何實濟耶又凡有論說諸臣不過敷陳頌揚套語如勵精圖治健行不息聖不自聖安愈求安之類若與不讀書者言之甚覺可

聽朕讀書明理凡事皆身體力行此等粉飾浮詞六十年中盈溢於耳久已厭聞爾等務須實心任事盡去虛文於國家方有裨益也○癸亥 上巡幸塞外啟鑾○以勒什布爲吏部左侍郎由內閣學士○丁卯 上駐蹕熱河○戊辰撫遠大將軍允禔奏遵旨不出口外駐紮西甯相機而行遣師分駐索落木波羅和邵

五月戊寅以麥大稔諭直隸河南山東山西暨塞外民及時收貯○丙戌以花鄴爲內閣學士由祭酒遷傳繕署甘肅按察使由詹事署○刑

部等議准差往浙江審事禮部侍郎王思軾等奏浙江正考官編修索泰應允侍讀學士陳恂屬託將陳鳳墀中式陸續借陳恂銀一千五百兩應擬斬監候秋後處決倩人作文黃緣中式之陳鳳墀營謀關節之陳莘衡陳恂應擬絞監候秋後處決陳鳳墀之父陳文熾往陳恂之子陳鈺家取回關節陳鈺接受銀兩轉付俱應

擬絞監候秋後處決費我功央伊岳父陳恂營謀關節未曾中式
應擬杖徒代陳鳳墀作文之段志閏照例枷責索泰等所得銀兩
並費我功所許銀兩俱追取入官同考官知縣洪農絞照例革職
副考官檢討張懋能應降二級調用從之○壬辰刑部等衙門議
准差往河南審事刑部尙書張廷樞等奏南陽府淅川縣把總羅
士英營內效力之民楊四因賭博被知縣崔錫枷責兵丁王爵等
不平向知府沈淵告理知府不允遂聚眾將沈淵擡至教場圍辱
應將王爵等照光棍爲首例擬斬立決爲從之劉長子等擬絞監
候秋後處決遊擊王洪道素與知府不和縱令兵丁將知府圍繞
教場陵辱又違總兵官令箭不論兵丁解散應擬斬監候秋後處
決把總羅士英應杖責發邊衛充軍總兵高成平素旣不能嚴束
兵弁事後又不奏參應照溺職例革職從之

六月丁未四川總督年羹堯奏探得西海各部落近因貝勒達顏病故各有吞併之意又聞策零敦多卜見令左哨頭目春木益爾帶六百餘兵過喀喇烏蘇河前往青海又聞發兵八千來藏已至業爾根克里野地方臣思自藏至打箭鑪南路險遠北路平近裏塘見有大兵南路可以無虞惟北路宜豫爲之防臣等已調兵防守中渡河口又酌調提標兵丁於打箭鑪附近地方駐紮防守霍耳一路報聞○工部左侍郎常泰以保舉非人革職○乙卯停本年秋決○丁巳轉滿丕爲工部左侍郎以穆爾台爲工部右侍郎

由內閣學士選

○議政大臣等議覆都統法喇等奏臣等遵旨將綠旗兵

令副將岳鍾琪帶領先行臣親領滿洲兵至打箭鑪據副將岳鍾琪等稱一到裏塘卽將達哇拉木渣巴第巴色布騰阿住等傳齊安撫伊等出言抗拒不給人口數目因擒拏達哇拉木渣木巴第

巴色布騰阿住並跟隨之人臣等隨訊問伊等領兵前來竊視我兵形勢情由俱各承認理應奏請正法但伊等所調之蠻人眾多遲則恐生事端故將達哇拉木渣木巴等七人俱已正法隨安慰裏塘所屬地方並宣諭巴爾喀木等處又令副將岳鍾琪領綠旗兵一千名進取巴塘查都統法喇前進招撫巴塘招撫後卽駐紮巴塘防守不可不發兵接應應行令護軍統領噶爾弼並總督年羹堯將見在打箭鑪之滿洲綠旗兵內酌量添發法喇處見在成都之滿洲綠旗兵內酌量派往打箭鑪駐紮至巴塘離雲南中甸不遠應行令都統武格偵探準噶爾之信酌量領兵應援從之○已未增河南開封府理事同知一○壬戌議政大臣等議覆四川總督年羹堯護軍統領噶爾弼奏據副將岳鍾琪等稱裏塘就撫後卽遣人至巴塘招撫及領兵行至巴塘所屬立登三木巴前往

招撫之人帶領喀木布第巴所遣之人來迎情願歸順遂准其投誠並令喀木布第巴開明戶口數目俟大兵一至巴塘卽來親遞查巴塘旣稱已經招撫應行令都統法喇仍駐紮巴塘看守從之

東華錄

康熙一百四

臣王先謙敬編

臣周澗菴恭校

秋七月甲戌以格爾布爲內閣學士

由左通政遷

○丙戌山東巡撫李

樹德奏今歲二麥豐收恭進土產麥麪

上諭大學士等據巡撫

李樹德奏山東闔省雨暘時若二麥豐收貢獻麥麪此端一開各省必互相效法貢獻各色物件不惟事煩抑或有不肖有司借端科派苦累小民亦未可定所進麥麪著發還

八月乙巳賑貴州鎮遠施秉二縣饑

○庚戌上行圍發熱河

己未諭近御侍衛等朕於騎射哨鹿行獵等事皆自幼學習稍有未合式處侍衛阿舒默爾根卽直奏無隱朕於諸事諳練者皆阿舒默爾根之功迄今猶念其誠實忠直未嘗忘也朕自幼至老凡

用鳥槍弓矢獲虎一百三十五熊二十豹二十五狢猓獬十麋鹿十四狼九十六野豬一百三十二哨獲之鹿凡數百其餘圍場內隨便射獲諸獸不勝記矣朕於一日內射兔三百一十八若庸常人畢世亦不能及此一日之數也朕所以屢諭爾等者以爾等年少宜加勤學凡事未有不學而能者朕亦不過由學而能豈生而能者乎○庚申議政大臣等議覆振武將軍傅爾丹等奏莫代察罕接爾與鄂爾齋圖果爾二處各築一城每城宜蓋房二千間自鄂爾齋圖果爾至莫代察罕接爾宜設立十一站應如所奏其新設驛站派理藩院司官一員前往會同該將軍將夫馬車輛等項照從前古北口外安站例設立其充發之人俟築城蓋房完日陸續發往令其耕種俟耕種一年後再派官兵駐防得旨依議設立驛站之處甚屬緊要著兵部尙書范時崇前往料理

九月癸酉禮部議准浙江提督學政汪瀛奏浙江衢州府西安縣之孔氏乃先師嫡裔查兗州府曲阜縣歲科兩試將孔氏進數十人鄉試另編耳字號將孔氏子孫及四氏子孫中式二人今衢州孔氏後裔繁衍仰請格外加恩於歲科兩試西安縣入學額數外將孔氏子孫另編字號每次額取二名從之○乙亥 上駐蹕克勒色欽賜來朝外藩銀幣鞍馬及隨圍蒙古官兵銀布○癸未

上還熱河○己丑以李世仁爲江蘇布政使

原任

傅澤淵爲浙江布

政使

原任江西布政使

○甲午

上回鑾

○乙未諭議政大臣等此次差

往西邊胡畢圖等前來回稱策零敦多卜等及土伯特眾喇嘛民人俱言在西甯見有新胡必爾汗實係達賴喇嘛之胡必爾汗天朝聖主將新胡必爾汗安置在達賴喇嘛禪榻上座廣施法教實與眾人相望之意允協且土伯特處時有瘴氣厄魯特之子孫不

能滋生多生疾病有何貪戀之處惟懇天朝聖主將法敎速爲廣施觀此情形似乎易解今將新胡必爾汗封爲達賴喇嘛給與冊印於明年青草發時送往藏地令登達賴喇嘛之座送往時著大臣帶滿洲兵一千名蒙古兵一千名土番兵二千名綠旗馬兵一千名步兵一千名前去其行糧牲畜接續之處令大將軍辦理再由巴爾喀木帶四川滿洲兵一千名綠旗兵一千名土番兵酌量派往其行糧牲畜接續之處今年夔堯辦理青海王貝勒貝子公等亦帶領屬兵或一萬或五六千送往前去策零敦多卜等若實爲法敎自必俟達賴喇嘛登禪榻然後前去若不行等候遁走卽爲無恥之賊此行大將軍帶兵馬在校羅木周圍水草佳處駐紮兼令其照管青海家屬四川兵二千名出口駐紮兼照管王察罕丹津行裝事關重大將此旨傳諭大將軍處令伊等公同確議具

奏又青海王台吉等令大將軍傳集一處曉諭唐古特國內達賴喇嘛班禪法教原係爾祖上設立今策妄阿喇布坦無故將拉藏殺害令寺廟喇嘛各自散去將眾鄂里格一路截斷令達賴喇嘛禪榻空虛從前爾將此新胡必爾汗稱爲達賴喇嘛之胡必爾汗若安置在達賴喇嘛禪榻爲法教廣施之事我等願捨命效力業經保奏土伯特之喇嘛民人及阿木島地方喇嘛等俱亦稱爲達賴喇嘛之胡必爾汗皇上將此胡必爾汗特封爲達賴喇嘛於明年一同送往藏地令登禪榻將法教廣施放開眾鄂里格一路令其販賣茶市此正宜效力之時爾等應各帶兵丁與送去之大臣會同一處前去爾等之意如何令伊等各陳己意會盟畫一具奏俟會盟完時令都統延信楚宗公策旺諾爾布侍讀學士常授等由固關前來京師具奏○戊戌多羅安郡王華玘薨予祭二次造

續立碑謚曰節○是月免安徽無爲州水災額賦及歙縣等五縣上年水災額賦有差

冬十月丁未 上還京師○壬子諭內閣學士長壽朕覽邵子聲音圖於各國聲音有不能該括處朕於聲音之學究心二十餘年雖未親至鄉里而鄉里人之聲音無不悉知有如清字之音有漢字所無者漢字之音亦有清字所未備者朕將此聲音圖討論多日欲該括各國聲音斷乎不能朕以爲性理精義內邵子聲音圖宜仍用漢字其清字圖可以不用蒙養齋修書舉人王蘭生諳曉音韻之學爾與之商酌觀其意見如何並將此旨令漢大臣同閱○甲寅吏部等衙門議覆差往貴州審事刑部員外郎齊克坦等奏查貴州巡撫黃國材進京陛見時布政使遲斡指貴陽等十一府屬官役俸工借與藩庫銀二萬五千二百餘兩一案據黃國材

供司道各府聞知進京陛見共送盤費銀一萬四千兩總督亦幫盤費銀一千兩是實並無借藩庫銀兩之處巡撫黃國材將各官所送盤費卽行收受不合應照例降三級調用其所受銀一萬五千兩追取入官布政使遲斡係專管庫帑之員私將庫銀指俸工借給應照例降三級調用總督蔣陳錫係封疆大臣不據實陳奏應降一級調用俱應如所擬得旨黃國材著解任蔣陳錫著降一級免其調用遲斡著降三級調用○贈故鎮綏將軍固原提督潘育龍爲太子少保子祭葬諡襄勇○丙辰吏部奏甘肅巡撫綽奇已派辦理軍餉其巡撫印務請派官一員署理得旨著內閣學士花部前往署理○丙寅以楊名時爲貴州布政使由直隸巡道遷○刑部尙書張廷樞奏據關聖帝君五十六世孫關爵呈稱原籍解州遷洛守墓竊見宋儒邵子程子後裔俱恩賜世襲博士爵祖墳墓在

洛春秋致祭懇與宋儒後裔一體恩賜博士臣思邵子程子發明忠孝節義之理關聖帝君力行忠孝節義之事可否給與世襲博士出自 聖恩下部議行○戊辰以金世揚爲貴州巡撫毛文銓爲雲南布政使

由湖北按察使遷

十一月辛未戶部左侍郎署副都統傅爾笏納以辦理旗務遲延革職○戶部議覆四川總督年羹堯奏裏塘巴塘地居荒服大兵一抵其地堪木布第巴率眾來歸請自康熙五十九年爲始願輸納錢糧其錢糧卽在軍前支用免入川省額賦俟西藏平定另行請旨定奪從之○乙亥諭大學士等敬 天尊 祖所關至重至大朕自御極以來凡壇廟祭祀朕俱親詣行禮年來因多病足痛不能親往每遣大臣恭代孔子云吾不與祭如不祭朕不能親詣念切欽承欲一瞻仰 郊壇而非祭祀之日則典儀未備又非盡

誠盡敬之理今朕躬稍愈如南苑湯泉乘肩輿俱可行走今冬至
齋戒之時朕足雖不得力潔誠之念有餘擬於祭日朕躬親詣於
祭祀之前升壇瞻仰省視俎豆若可跪拜朕拜後退處更衣幄
次俟恭代親王行禮畢然後還宮朕心始安已將此旨諭諸皇子
爾大臣會同議奏此係冊行之禮如漢大臣以從無此典或引據
書史爲言朕年已老在位六十年矣豈易得此例乎目今朕躬安
好可以前往儻此數日內朕躬稍覺不能親往再傳諭停止未晚
也尋奏皇上敬天之心誠一無間凡遇祭祀必躬詣行禮六
十年如一日今聖壽將屆七旬足病稍愈卽欲躬詣天壇告
虔行禮聖心誠敬如此早爲天心昭鑒但時值嚴寒尤宜調
攝聖躬矧在宮齋戒與親詣祭所俱一體敬謹仰懇俯允眾情
停止親詣行禮上命諸皇子傳諭曰天壇朕必親往前者

朕躬欠安偶未親祭王以下公以上俱不齋戒此次著照常齋戒
隨朕前往不必隨朕行禮朕行禮時不必贊禮作樂俟拜畢至更
衣幄次派出親王偕眾行禮禮畢朕乃還宮朕躬親往之處亦著
書於祝文內諸臣又奏本月十二日 皇上躬詣 天壇十一日
御 太和殿視祝文香帛 聖躬未免太勞懇祈 皇上暫停親
視令內閣恭捧送往得旨照常親視祝版○丙子革職畱任禮部
尚書陳詵以老病乞休命復還原職致仕○辛巳裁山東膠萊分
司應管事務令濱樂分司兼轄○吏部議覆山東巡撫李樹德奏
兗州府屬州縣及東昌府屬夏津等九州縣向隸東兗道管轄東
兗道奉裁以後東兗兩府所屬州縣事務統歸兩知府管理至稽
察該府之倉庫錢糧及一切地方事務竟無統轄之員請將兗州
府屬州縣事務改歸濟甯道轄東昌府屬夏津等九州縣事務改

歸濟東道轄從之○庚寅增江西解額○轉敦稗爲戶部左侍郎

以赫成額爲戶部右侍郎

由左副都御史遷

○辛卯予故理藩院尙書赫

壽祭葬○丁酉以張安世爲湖南按察使

由直隸通永道遷

○江南江西

總督長蘄奏鳳陽府屬壽州知州王承勳首告鳳陽府知府蔣國

正勒索銀一萬一千八百兩安徽布政使年希堯勒索銀五千八

百餘兩又康熙五十六七等年蠲免民欠錢糧司府勾通捏造民

欠冒蠲銀四千餘兩請將布政使年希堯知府蔣國正知州王承

勳俱離任質審得旨著兵部右侍郎田從典左副都御史屠沂前

往審理○是月免江南高郵州山陽縣水災額賦有差

十二月庚子盛京戶部侍郎董國禮緣事革職○壬寅以蔡升元

爲禮部尙書

由左都御史遷

○癸卯以伊特海爲左副都御史

由通政使遷

○

戊申前西安將軍額倫特之喪回京命恒親王允禩貝子允禩迎

奠○己酉以田從典爲左都御史

由兵部右侍郎遷

花鄩爲盛京戶部侍

郎仍署甘肅巡撫

由內閣學士遷

○乙卯以王度昭爲兵部右侍郎

原任工部

右侍郎

○丙辰議政大臣軍前召至大臣九卿等公同議奏進藏一

事得旨此議尙未周詳止議西地進兵並未議及阿爾泰巴爾庫爾兩路之兵兩路兵會合取吐魯番若烏魯木齊難以堵塞看守應將兩路之兵會合襲擊或各減騎進入從呼爾達拉之處襲擊則彼必畏懼自然棄此牧放牲畜之處而去再聞知西地大兵進剿並兩路兵襲擊不但驚惶無措亦且首尾不能相顧矣額駙阿寶所屬厄魯特兵五百名察哈爾兵四百名今帶往取藏此柴旦木所有之兵亦令前往取藏大將軍畱駐穆魯烏蘇三千兵內令派兵一千前進大將軍處之兵若少將京師每佐領下派出護軍二名馬兵一名於二月內起程前往西甯今新胡必爾汗奏稱各

處俱有禪牀皆可安設若爲我興兵實關繫衆生此或是新胡必爾汗之意或是青海台吉等畏懼策妄阿喇布坦密屬新胡必爾汗奏亦難豫知儻新胡必爾汗與青海台吉等意同此新胡必爾汗不可送往青海台吉等若無此意必將新胡必爾汗送往安設禪牀廣施法教令土伯特之衆誠心歸向則策零敦多卜自畏勢逃遁我師進藏定立法教之後或畱兵一二千暫行看守或久住則土伯特之衆卽如我兵縱策妄阿喇布坦策零敦多卜發兵前來伊係勞苦之兵我則安逸之兵卽可剿滅朕意如此事關重大不可急迫從容周詳定議爲是今若照衆大臣議惟行看守自西甯至四川雲南內外土番雜居一處西藏之人皆係土番伊等俱是一類儻藏地被策零敦多卜占據則藏兵卽是彼之兵丁而邊疆土番豈能保全爾等暫且看守之議不合著另行周詳定議具

奏○己未以登德爲內閣學士

由祭酒遷

○裁湖北驛鹽道歸糧道管

理○庚申命截畱湖廣漕糧十萬石分貯所在府州縣備荒○辛酉諭戶部比年興兵征期遠厯邊陲居送行齎民力勞瘁朕曾將陝甘所屬今年地丁及逋賦悉行蠲免而沿邊州縣衛所軍行旣多飛輓之勞辦賦復滋催科之擾若非格外加恩小民恐致失業所有沿邊六十六州縣衛所堡明年額徵地丁銀盡行蠲免○議政大臣軍前召至大臣九卿等遵旨議覆送往新必爾汗兵八千爲勢稍弱應再添兵四千令額駙阿寶親身帶厄魯特兵五百名副都統常齡帶察哈爾兵四百名同往其柴旦木駐防之都統阿爾納處二千兵內派千五百名令侍衛阿齊圖等帶領前往大將軍畱駐穆魯斯烏蘇三千兵內撥派一千六百名此進藏之兵共一萬二千名派大臣一員授爲將軍給與印敕令其統理新胡必

爾汗封爲達賴喇嘛應給印敕名號等項令各該處議奏都統延
信楚宗公策旺諾爾布侍讀學士常授等同時令與大將軍商酌
青海台吉等若實心送去卽將新胡必爾汗與兵馬一同前往若
俟事定之日送去令暫住滾穆布木廟內先遣大兵將藏地攻取
令阿寶所領之五百兵並察哈爾四百兵滿漢二千兵青海二千
兵俱駐紮看守再令都統法喇等酌量帶兵由巴爾喀木一路前
進噶爾弼年羹堯亦派兵二千名發往法喇軍前都統武格帶往
兵內挑選滿兵一千綠旗兵二千滿兵令都統武格副都統吳納
哈統領綠旗兵令總兵官趙坤馬會伯統領前往與法喇之兵會
合應於何日起程何地會合之處令大將軍咨行商酌約會一同
前進再將阿爾泰二萬兵內挑選一萬五千令裹帶三月口糧於
六月下旬自布喇罕布魯爾兩處前進若策妄阿喇布坦不行防

備卽深入襲擊若知覺防備將兵速行帶回巴爾庫爾一萬三千兵內挑選一萬令三千兵輕騎襲擊吐魯番二千兵輕騎襲擊烏魯木齊所餘五千兵令其徐徐前進接濟襲擊烏魯木齊之後此襲擊之兵俱令裹帶兩月口糧於七月初旬與阿爾泰之兵約定前進其襲擊之兵及駐紮之兵令何人統領進藏之兵於軍前大臣內派何人爲將軍及西甯等處提督總兵官內將何人派往之處伏候諭旨得旨此議甚詳事務關緊重大著行令大將軍等與青海台吉等公同定議具奏○是月免江南清河淮安等五縣衛水災額賦有差○是歲朝鮮琉球來貢○人丁戶口二千四百七十二萬二千四百二十四又永不加賦滋生人丁二十九萬八千五百四十五田地山蕩畦地七百二十六萬七千八百二十二頃五十畝有奇徵銀二千八百一十五萬四千五百五十二兩有奇

米豆麥六百九十萬二千二百三十五石有奇草四百五萬五千
六百六十五束茶二十九萬五千五百二十引行鹽五百一十一
萬五千七百二十五引徵課銀三百七十七萬三千六百五十五
兩有奇鑄錢四萬三千七百四十五萬五千八百有奇

東華錄

康熙一百五

臣王先謙敬編

臣周潤蕃恭校

康熙五十九年庚子春正月壬申諭議政大臣等 太祖 太宗
時滿洲兵凡遇征戰馬匹口糧自備行走所向立功並無遲誤今
官兵行走處馬匹口糧器械等俱給帑置辦且以爲不足而怨咨
生焉此皆由該管官不行嚴飭之故也朕辦理軍務閱歷甚多向
時攻取岳州但從陸路抵禦許久不克朕諭令於洞庭湖豫備船
隻以水路遏賊貝勒察尼奏湖中風浪甚大船不能行恐有礙於
兵丁請撤戰船朕諭以岳州城已被困不久卽下若將戰船撤回
賊得由水道往來何能有得岳州之期哉於是不撤兵船嚴飭防
守未幾而岳州下矣再征討雲南時滿漢官兵合計四十餘萬貝

子章泰等離雲南城四十里安營一面臨湖一面抵山並未設兵湖中斷其水路致賊寇米糧照舊運行城內並無危急後趙良棟率甯夏兵至云我等大兵連營四布不就近速戰迨至日久米糧不繼滿兵無妨綠旗兵何以存立耶章泰云皇上豢養之滿洲豈可輕進委之於敵且爾兵初來亦宜休養何可令其傷損趙良棟不從章泰之言自率標兵前往力戰奪取得勝橋而趙良棟之兵亦瘁甚矣章泰又向趙良棟云爾兵已瘁應暫撤回令總督蔡毓榮率兵看守趙良棟云我死戰所得之地肯交與他人看守乎因此章泰亦進軍圍城賊兵被偏而出在桂花寺地方與我兵接戰大敗之吳世璠等倉皇失措無所逃匿乃自殺餘賊獻城投降此亦由決於進戰乃得成功也再出征烏蘭布通時阿密達因天晚撤兵云皇上必不以撤兵故遂殺我等將兵撤退索額圖明珠選

勇士數百人近身防護勇士云挑選我輩原擬或戰或追詎意止令防護共生忿怨後中路出兵時令大臣官員等會議進兵之處眾皆謂不可獨朕與費揚古以兵爲可進決意進兵及至科圖地方眾皆不欲前發大臣等勸朕撤兵朕諭以祭告 天地 太廟

社稷親統兵前來不見賊蹤如何驟行撤去不允所請將兵前進噶爾丹聞我兵威甚是驚懼鼠竄而去朕選兵令馬思喀爲將軍尾追噶爾丹又遇西路兵攻擊大敗之朕將中路初次運到之米遣明珠速送至費揚古軍前二次米亦卽令續送三次米內朕但畱十八日口糧餘俱送西路軍前是以西路兵丁未至飢餓得保全而回彼時若輕信大臣等言中道撤兵則兩路兵丁安得立功奏凱耶今觀領兵大臣官員等止爲保身之計不以國事爲重內存私意彼此爭論不和又向兵丁等沽名市恩多取口糧及不

能馱載至於拋棄全無珍惜之意如此居心行事可乎朕之滿洲兵俱極精練全在領兵者將國家之事專心辦理不圖安逸賞罰嚴明則斷無錯誤進兵西藏時色楞不候眾人獨自前往額倫特亦隨後追至爲國家奮不顧身雖至失機豈可論伊等進兵太速乎今策妄諾爾布係差往策應之兵而遲延不前雖伊所統兵丁善全而歸伊屬下之兵固然感念於國事有何裨益惟西路陣亡兵丁朕甚爲憐憫當分別加恩至大臣官員等在部院衙門亦能清廉自守若行軍大事又非僅清廉自守者所能勝任也朕年少時每於講武練兵等事違命者必懲以法內外大小悉知儆惕由此觀之訓練之事不可疏忽也茲眾喀爾喀及青海等俱服朕之風化而策妄阿喇布坦之人霸占藏地毀其寺廟散其番僧青海台吉理應棄命忘身奮勇致討乃伊等口稱維持黃教卻無實心

效力之人策零敦多卜領兵在藏以我兵隔遠不能往救朕思伊等兵步行一年忍飢帶餒尙能到藏我兵願不能至乎今滿漢大臣咸謂不必進兵朕意此時不進兵安藏賊寇無所忌憚或煽惑沿邊番部將作何處置耶故特諭爾等安藏大兵決宜前進○己卯諸王大臣等奏 皇上御極六十年請行慶賀典禮 上諭朕在位五十九年皆由 上蒼眷佑 先聖造福之所致也見在西陲用兵軍民勞苦去歲正月朔日食今年七月朔又值日食海洋颶風飄沒官兵船隻山左東三府水發被淹黎民饑饉淮黃水太僅能搶護人心風俗未盡醇官箴政事未盡理此正君臣孜孜求治之時慶賀之事著停止○壬辰戶部等衙門議覆廣東廣西巡鹽御史昌保奏兩廣鹽課有歷年積欠九十一萬餘兩康熙五十七年十月經督臣楊琳奏請先完新餉舊欠五年帶銷奉旨督臣

兼理各屬懷遵臣於康熙五十八年三月到任查舊欠全未清完因截住舊鹽飭完新餉不但舊欠屢催罔應新餉又復拖欠且場鹽缺少私鹽橫行臣力不能任請將臣撤回交督撫管理庶新舊課餉得按年清完應如所奏將兩廣鹽務並新舊錢糧交與廣東廣西總督楊琳專理從之○丁酉命撫遠大將軍允禔率前鋒統領弘曙移駐穆魯斯烏蘇管理進藏軍務糧餉投都統宗室延信爲平逆將軍率兵進藏以公策旺諾爾布副都統阿琳寶額駙阿寶隨印侍讀學士常授提督馬見伯總兵官李麟參贊軍務○調西安將軍宗室查布駐防西甯平郡王訥爾素駐防古木○調征裕親王保泰子廣善簡親王雅爾江阿子永謙貝子魯賓護國將軍敬順回京從撫遠大將軍允禔請也

二月戊戌朔宗人府奏 皇上六十年來教養宗室屢次加恩自

親王以下至閒散宗室覺羅等俱賜以厚祿其貧苦者賜之田房
奴僕年高者賜 御書匾額表揚吉凶等事特立官庫賜給銀兩
乏嗣者特施洪恩爲之立後所以宗室覺羅等各得自立恆產臣
等請將康熙元年起 皇上蒙養教誨宗室等屢次所頒 上諭

並恩賞之處逐一開載於宗人府衙門建碑刻文永垂萬世報聞

○甲辰 上巡幸畿甸啟鑒○癸丑諭大學士等總督年羹堯自
軍興以來盡心效力訓練川兵甚是整齊可速行文與年羹堯令
伊帶領兵丁進藏授爲將軍如有能署理總督事務於地方不至
生事者令年羹堯奏聞署理如地方緊要不得署理之人著護軍
統領噶爾弼爲將軍帶領雲南四川兩處兵馬前進定西將軍印
速行送往尋年羹堯覆奏四川總督印務一時無可署理之人定
西將軍之印請交與噶爾弼管理授爲將軍率領兵丁進藏並調

都統法喇於打箭鑪地方駐紮防守從之○先是撫遠大將軍允
禔覆奏臣遵旨傳集青海王台吉等會議進兵安藏及送新胡必
爾汗往藏之事其青海王台吉等皆同心協力情願派兵隨征並
請封新胡必爾汗掌持黃教至是命封新胡必爾汗爲宏法覺眾
第六世達賴喇嘛派滿漢官兵及青海之兵送往西藏其四十九
旗扎薩克並喀爾喀澤卜尊丹巴胡土克圖等亦令遣使會送○
辛酉 上還京師○甲子議政大臣等議覆雲南貴州總督蔣陳
錫奏中甸地方原係雲南麗江土府所屬吳逆背叛時割賂西藏
今巴塘裏塘雖經四川招撫而中甸一帶距蜀甚遠附滇最近尙
有錢糧在麗江完納非四川舊屬也茲據麗江土知府木興詳報
中甸等處番目及喇嘛營官到麗江投誠願仍歸雲南管轄應如
所請將附近中甸地方及巴塘裏塘仍歸麗江土府管轄從之○

乙丑吏部議准廣西巡撫宜思恭奏土司承襲世職從無考覈請嗣後大計之期與流官一體考覈優劣其升賞降革之處仍照土司定例遵行如該管官有舉覈不實者一併議處從之

三月己丑命雲南巡撫張谷貞駐防麗江中甸○丙申靖逆將軍富甯安奏今歲議發大兵進剿西藏其阿爾泰巴爾庫爾兩路兵亦約會前進襲擊準噶爾邊境之地使賊人擾亂可以相機行事臣請率兵三千從烏魯木齊一路前往分兵四千由吐魯番一路前往其領兵大臣請旨派遣又兩路進兵之後另派兵三千隨後策應其餘存留之兵請暫交副都統雅圖侍郎海壽等管理得旨交與議政尋議政大臣等議覆將軍富甯安奏請派兵襲擊之處應如所奏其襲擊吐魯番一路兵令散秩大臣阿喇納統領前進從之○征西將軍祁里德奏阿爾泰一路官兵臣請領七千人從

布婁爾一路前進將軍傅爾丹領八千人從布喇罕一路前進襲擊準噶爾邊境之地其餘兵丁請另派大臣統領得旨交與議政尋議政大臣等議覆將軍祁里德奏請派兵襲擊之處應如所奏其存畱之兵應令將軍顏壽都統穆賽等統領擇形勝地方駐紮防守從之

夏四月壬寅議政大臣等議覆四川總督年羹堯奏巴塘裏塘近經雲貴督臣奏請歸麗江土知府管轄臣查巴塘裏塘向爲西藏侵占臣宣示 聖主恩威招撫投順雖歸蜀歸滇莫非王土但四川見在用兵一切運糧調遣之事道經巴塘裏塘關係緊要撥歸土司則呼之不應移咨滇省則往返遲延請仍歸四川管轄有濟軍務又准都統武格咨稱雲南進藏兵丁須接運三月口糧雲南山高路狹艱於運送請以四川所運之米支給查滇蜀兩省俱各

進兵而蜀省進兵七千滇省進兵三千多寡懸殊恐蜀省所運之糧不足供滇省之用應如年羹堯所奏行文雲南督撫將雲南進藏兵糧速行趲運如武格等所領之兵與噶爾弼兵會後或雲南運米未到仍暫撥四川餘糧支給卽於雲南所運之米照數補還其巴塘裏塘應暫歸四川統轄俟事平日再照原議改隸雲南從之○癸卯以石文焯爲江西按察使

由饒九南道遷

○戊申

上巡幸塞

外啟鑾○辛亥命禮部祈雨○戊午戶部尙書趙申喬以衰疾乞休上諭大學士等覽趙申喬奏疏朕深憐之念其操守清廉始

終一轍性雖暴躁而爲人樸直年近八旬病勢料難全愈儻一時不保亦未可定趙申喬乃革職畱任之官可復還原職仍令在任調理其應賠之銀亦著從寬免追爾等將此旨速行發去使病人早知一日五內安甯便於調攝頤養也○壬戌上駐蹕熱河○

是月免江南高郵江都等八州縣上年水災額賦有差

五月壬申命副都統覺羅圖拉參贊傅爾丹軍務○己卯刑部左侍郎李華之以老乞休允之○刑部等衙門議覆左都御史田從典等察審鳳陽府潁州知州王承勳訐告安徽布政使年希堯鳳陽府知府蔣國正需索規禮偏勒交代將虧空銀兩捏造民欠冒蠲錢糧等款除年希堯需索規禮偏勒交代之處並無證據無庸議外其蔣國正於交代時雖未向王承勳偏勒出結但曾收王承勳規禮銀八百餘兩又前任潁州知州王盛文虧空帑銀捏造民欠蔣國正不行查出迨王盛文病故後承認代賠並無完解復因康熙四十六七等年分蠲免民欠錢糧將伊應賠帑銀三千七百九十餘兩潤入民欠冊內希圖冒蠲情實蔣國正應照侵盜錢糧例擬斬監候其捏造民欠及收受規禮銀兩俱著落蔣國正照數

追完年希堯於蔣國正冒蠲錢糧不行查出應照失察例革職從之○辛巳諭大學士等今年爲祈雨屢次降旨雖已得雨尙未霑足應虔誠祈禱至政事有可更改之處著九卿議奏○諭議政大臣等今歲稍旱應速行文與各路將軍或營中亢旱馬匹未肥或進兵之路甚旱水草不敷俱未可定勿謂旣經議定進兵不敢復以亢旱爲辭奏請停止朕念軍務所關甚大從前屢諭爾等及領兵大臣凡軍機之事有今日定議明日又改者未可拘執要在相其機變而行朕於用兵之事必熟思而後頒發旨意若無旨意又恐軍中之大臣難於奉行也然軍前或因亢旱而無水草馬匹倒斃則兵丁如何前進如何回旋明年又如何進兵耶總之雨水及時牧草果好前進自無艱阻應卽行進兵儻或亢旱馬匹疲瘦雨水不調牧草不堪則卽以不宜進兵之處令軍中之大臣等定議

具奏斷不可以今歲若不進兵來年亦可再進作游移之語陳奏也路途遙遠恐發去文書遲延遺失亦未可定須於明日行文一次續後再行文一次有一處不可進兵卽著將此一處奏請停止

○甲申大雨○戊子以張廷玉爲刑部左侍郎

由內閣學士遷

六月己亥陝西饑命發廩並運河南開封等府積穀賑之○癸卯靖逆將軍富甯安振武將軍傅爾丹征西將軍祁里德等奏巴爾庫爾阿爾泰兩路駐兵之處雨水調和馬匹肥壯又進擊策妄阿喇布坦邊界偵探沿途皆有水草應遵照原議巴爾庫爾兵於七月初一日起程阿爾泰兵於六月十六日起程前進報聞○直隸保安懷來山西蔚州地震是日京師地微震○丙辰諭大學士等朕聞保安懷來地震宜速遣大臣賑濟若俟部中啟奏恐致遲延署副都御史楊柱屠沂速自京城出居庸關往延慶保安懷來沙

城等處查閱一面奏聞加恩並查驗蔚州廣昌渾源等處如果被災著一併加恩○戊午禁商船以火礮軍器出洋

東華錄

康熙一百六

臣王先謙敬編

臣周澗蕃恭校

秋七月丙寅朔日有食之○丁卯免直隸保安等州縣額賦二年

○庚午以李馥爲安徽布政使

由江蘇按察使遷

張聖弼爲湖北布政使

由按察使遷

○先是

上諭戶部直隸各省錢糧虧空甚多作何立法

使虧空之弊永遠清理著行文各該督撫確議具奏至是戶部據各該督撫等覆奏會覈定議查直隸各省督撫等所奏或與定例相符或於錢糧無益者均無庸議外如陝西總督鄂海福建浙江總督覺羅滿保廣東廣西總督楊琳浙江巡撫朱軾廣東巡撫楊宗仁廣西巡撫宜思恭湖廣巡撫張連登偏沅巡撫王之樞福建巡撫呂猶龍奏州縣錢糧令知府嚴加稽查隨徵隨解無許久存

州縣庫內以絕侵那之弊應如所請嗣後州縣徵收錢糧務令隨徵隨解如遲延不解卽令該府查報參處如州縣批解錢糧而布政使抵充雜派扣批不發許州縣官申報督撫並報部院衙門奏參四川總督年羹堯江南江西總督長蘅奏州縣虧空錢糧或知府有扶同徇隱情弊別經發覺者請將知府參革責令獨賠應如所請令各該督撫確查虧空情由或因知府扶同徇隱以致虧空者卽行參革令知府獨賠江南江西總督長蘅雲南貴州總督蔣陳錫山西巡撫蘇克濟奏州縣官恃有上司分賠之例本無虧空將庫銀藏匿假捏虧空應令督撫覈實奏參嚴加議處其虧空銀兩仍在該州縣名下獨賠應如所請嗣後州縣官有捏報虧空審明定擬卽於本犯名下獨追還項河南巡撫楊宗義雲南巡撫甘國璧江西巡撫白潢護理貴州巡撫布政使遲斡奏州縣因公那

用虧空錢糧請照霉爛倉穀之例革職留任限年賠完其霉爛倉穀者不論在任解任以及分賠之知府能於限內全完准其開復應如所請虧空錢糧果係因公那用者將該員革職留任勒限賠補限內全完准其開復至霉爛倉穀見在參追者於一年限內如數完補亦准開復再州縣虧空錢糧或有知府揭報而布政使不卽轉揭或已揭而督撫不卽奏參者應令該知府申報部院將督撫布政使等官俱照徇庇例議處仍令分賠其衛所官員虧空屯衛等項錢糧亦照地丁之例處分著爲定例以上徵解追賠各條既經各該督撫等具奏定議卽應責成督撫如虧空未發之先伊等不盡心防範虧空已覺之後伊等不竭力補苴應將該督撫嚴加議處責令分賠完項從之○工部等衙門議覆福建浙江總督覺羅滿保奏浙江海塘事宜一海甯縣老鹽倉北岸東自蒲爾兜

起西至姚家堰止共一千三百四十丈砌築石塘可保護杭州嘉興湖州三府民田其沿海要害處應築草壩以資抵禦一海甯縣沿海地方俱係沙土今沿塘新有漲沙乘此速將石塘砌築將來沙土漸聚便可擁護塘根每塘一丈用大石砌作十層共高二丈塘面之內培築土塘計高一丈寬二丈一開中小壑一帶淤沙以復江海故道則海甯土塘石塘可免潮水衝決一築上虞縣夏葢山石塘一千七百九十丈以防南岸潮患一調委經理各官以專責成如有怠玩誤工侵冒滋弊者察出參處一請專員歲修以保永固其南岸紹興府之上虞餘姚山陰會稽蕭山五縣石塘土塘交紹興府同知管理北岸杭州府之海甯仁和錢塘三縣石塘土塘將金華府同知裁去添設杭州府海防同知一員管理嘉興府之海鹽平湖二縣石塘土塘交嘉興府同知管理一凡江海潮神

向登祀典者祈 皇上加贈封號廟額令有司春秋致祭從之○
乙亥諭大學士等朕先巡幸陝西曾問黃河水路由河南通至陝
西之處地方官回奏不能行走朕思上古大禹鑿龍門通濬水道
漢唐之時俱經輓運豈有不能行船之理故特遣皇子允祉往勘
允祉乘騎渡黃河至砥柱龍門查看竟可行船由龍門至黃河直
通渭河可至西安北門從絳州汾河可至山西太原彼時山西陝
西河南將軍督撫等亦會令會看今總督施世綸居官素優歷年
漕船俱催趲全完並無遲誤本年漕船已經過淮更無他事漕運
印務著暫交與總河趙世顯署理施世綸速赴豫省將河南府至
西安黃河輓運路徑勘明具奏陝西見存穀石數目亦著查奏今
陝西正值軍需之際施世綸暫駐陝西令協同鄂海辦理糧餉事
務○戊子以白潢爲戶部右侍郎王企靖爲江西巡撫

由戶部左
侍郎遷

○是月免浙江錢塘等二十一縣上年旱災額賦有差

八月丁酉以森圖爲山西按察使

由郎中遷

○戊戌 上行圍發熱河

○庚子琉球國中山王尙敬奏請伊國官生入監讀書允之○甲辰靖逆將軍富甯安奏臣於七月初一日率兵七千啟行初二日駐紮集選精兵一千輕騎前進至烏爾圖晝伏夜行初六日黎明進兵烏闌烏蘇之口及托和穆圖等處並無賊哨四面搜捕亦無蹤迹初七日進兵烏闌烏蘇口內是晚派一等侍衛哲爾德等領兵前赴阿克塔斯派二等侍衛克什圖一等侍衛阿玉錫等領兵前赴伊爾布爾和韶分擊賊哨瀕行時臣屬哲爾德等烏闌烏蘇與阿克塔斯相距七十里與伊爾布爾和韶相距百餘里爾等至阿克塔斯相近處卽行潛伏約計克什圖之兵至伊爾布爾和韶時爾等始行往擊慎勿急於進兵使伊爾布爾和韶之賊豫先知

覺又屬克什圖等爾等沿瀚海邊界前進於天未明時卽抵伊爾布爾和韶圍擊賊哨臣率署前鋒統領法璫副都統常壽等隨後前進初八日侍衛哲爾德等擊阿克塔斯賊哨賊眾畏我兵勢望風而走我兵急往追捕擒獲一賊餘賊入深山中逃散侍衛克什圖等擊伊爾布爾和韶賊哨見賊之馬匹在谷內營邊牧放阿玉錫帶領十餘騎入谷奪賊馬百餘匹而同賊以我兵奄至據高絕險處藏身樹石中放槍拒敵克什圖等率兵奮勇追擊阿玉錫衝入賊中刺殺三人眾官兵等共殺賊三十餘人生擒二十四人所獲馬匹器械等物臣卽分給效力官兵等其賊哨頭目杜爾伯特台吉垂木拍爾見被擒獲宜卽解送京師因垂木拍爾身帶重傷暫送巴爾庫爾交付副都統雅圖俟回兵時解送其餘擒獲之賊應否全送京師請旨定奪得旨將軍富甯安圍擊賊哨生擒賊二

十餘人著行文副都統雅圖派兵送來京師沿途嚴加看守勿致逃亡其垂木拍爾暫停起解俟瘡痕愈後再行解京○丙午以裴律度爲湖北按察使由浙江鹽道遷葛繼孔爲江蘇按察使由福建興泉道遷

○增本裕倉漢監督一○癸丑征西將軍祁里德奏臣率領官兵前往襲擊厄魯特吳梁海等隨我兵之尾要截後路另派兵一千二百人留阿保喀布沁追尋厄魯特往來之人及山谷中之設伏吳梁海等蹤迹陸續擒厄魯特吳梁海等共四百餘人七月二十九日臣領兵自鏗額爾河前進探知厄魯特寨桑色布騰等率賊眾赴鏗額爾河據山守險臣遣人招降賊特險拒敵我師派分兩道奮勇夾擊之賊眾大敗奔駐山麓至次日復遣人往諭宣布聖主威德寨桑色布騰等率千餘人來降所獲馬駝牛羊共萬有餘隻其寨桑色布騰等俟回兵之日另派官兵護送京師得旨

此次擒獲之人及投降之寨桑色布騰等派官兵解送時著喀爾喀協濟先送至歸化城將其中頭目數人驛送至京其餘吳梁海之人交與公博貝設法護送勿致逃竄○以高其倬爲廣西巡撫

由內閣學士遷

○甲子靖逆將軍富甯安奏散秩大臣阿喇衲等於七月

初八日進兵齊克塔木遇賊兵設立營寨擊破之擒殺二十餘人賊眾悉降初十日至皮禪城有回子兵守城拒敵官兵進擊擒回子一人復遣歸令曉諭眾回子等我師爲征剿策妄阿喇布坦而來與伊等無涉若速行歸順卽免屠戮否則進兵破城後悔無及是日皮禪城回子頭目率三百餘人來降十三日大兵至吐魯番吐魯番之阿克蘇爾坦及總管頭目沙克扎拍爾等俱率眾迎降共獲鳥槍五百五十桿駝四十隻馬五百匹阿喇衲等於七月十六日帶沙克扎拍爾等及官兵凱旋得旨將軍富甯安所奏著鈔

發京城傳諸王滿漢大臣等公同看閱○是月免浙江會稽上虞二縣上年風災額賦有差

九月乙丑朔以李周望李紱俱爲內閣學士

李周望由詹事李紱由翰林院侍講學士

○壬申靖逆將軍富甯安奏臣於七月十八日至烏魯木齊賊人並未設哨隨遣滿漢官兵徧搜亦無蹤迹有烏魯木齊及哈西哈等處地方逃出回子陸續投降臣詢以策妄阿喇布坦之信據稱伊等係哈密屬下人爲賊兵擄掠而來本月十一日賊目徹格爾得自伊爾布爾和韶奔回通知信息云 皇上大兵已至伊爾布爾和韶將台吉吹木拍爾所領之兵盡行剿殺故烏魯木齊有吹木拍爾所屬之人及附近地方厄魯特之人俱各震驚奔竄伊等得乘閒逃出卽來投順又稱烏魯木齊地方今年甚旱牲畜倒斃甚多臣遣人細加偵探與回子之言無異其阿喇衲襲擊吐魯

番兵先於七月二十四日回至烏闌烏蘇臣所領兵於八月初二日亦回至烏闌烏蘇初三日合兵凱旋初十日抵巴爾庫爾得旨交與議政○丙子 上駐蹕博洛和屯賜來朝外藩銀幣鞍馬及隨圍蒙古官兵銀布○丁丑吏部議覆署甘肅巡撫花部奏參平涼府知府蔣兆龍才力不及應照例降二級調用得旨西邊正值軍務之時地方不肖官員或多有意規避情願降調及離任回籍又希圖效力復職者此輩不可不懲蔣兆龍著革職永不敘用自後凡有此等官員俱著照此例議處○戊寅 上還熱河○雲南貴州總督蔣陳錫雲南巡撫甘國璧以都統武格將軍噶爾弼從叉木多起行撥用四川雲南二省糧餉具摺陳奏得旨蔣陳錫甘國璧皆係地方大臣雲南進藏之兵各項糧餉應豫先料理如期運送今蔣陳錫甘國璧於糧餉之事並不留心料理幾至遲誤及

大兵進藏之後伊等方以運送米糧之事繕摺奏聞四川之米若不到雲南之兵從何就食蔣陳錫甘國璧顯然有誤軍機俱著革職令自備口糧運米進藏如遲誤不能抵藏卽行正法其雲南貴州總督事務著貴州提督張文煥署理雲南巡撫事務著貴州布政使楊名時署理貴州提督事務著河南南陽總兵官張致署理南陽總兵官事務著河南巡撫楊宗義於本省副將內揀選一人奏請署理伊等俱著速行赴任○壬午振武將軍傅爾丹奏臣領兵至格爾厄爾格有厄魯特之人聞大兵卽至委棄帳房等物四路逃散臣等分兵進剿於七月二十一日追及之共殺賊二百餘人擒寨桑貝肯等百餘人招降三百餘人並獲馬駝器械等物又探知烏闌呼集爾爲厄魯特屯集耕種之所臣親督官兵踐踏其地並將賊所積糧草焚毀一空整隊而回賊乘我師之尾潛來犯

我師截擊之賊復敗遁請將寨桑貝肯等解送京師得旨將軍傅

爾丹所奏著鈔發京城傳諸王文武大臣公同看閱○戊子以楊

柱爲盛京兵部侍郎

由左副都御史遷

○翁牛特多羅杜楞郡王和碩額

駙蒼津喀喇沁多羅郡王和碩額駙伊達木扎卜土默特多羅達

爾漢貝勒和碩額駙阿喇卜坦等奏臣等所屬旗分因亢旱歉收

人口乏食請借支倉米賑濟於豐收之日如數交倉得旨各旗分

設倉貯米原以備水旱賑濟之用從前蘇尼特阿霸垓等旗分荒

旱之年朕曾令發帑賑濟其翁牛特等所屬之人朕視之均係一

體該王貝勒等以此奏請極合朕心著卽照所請行如尙有不敷

之處仍著再行陳奏○庚寅 上回鑾○辛卯以高其佩爲四川

按察使

由永甯道遷

○漕運總督施世綸奏臣遵旨查河南府孟津縣

至陝州太陽渡大小數十餘灘雖有緯路高低不等或在河南或

在河北惟圪把窩魚林添等處緯路年久閒有坍卸其澠池以下水道下水之船可載糧三百餘石上水之船載及其半澠池以上河高汎激船可輓數十石由砥柱至三門神門本無緯路若小舟乘東南風猶或可上鬼門水勢洶湧土人從未行舟惟人門稍緩石崖鑿有緯路路旁鑿有方眼又有石鼻臣愚以爲石鼻可穿鐵索方眼可裝木限援手助力亦未可知觀此則從前輓運之蹟猶存誠如 聖諭自陝州至西安府河水平穩俱有輓運路徑臣謹將河道水勢並緯路繪圖呈覽下部知之○是月免四川會甯等一十七州縣衛所上年旱災額賦有差

冬十月壬寅戶部等衙門議覆漕運總督施世綸遵旨查奏河南府至陝州之三門一帶河道輓運米穀見在無可覓之船請以河南府至陝州太陽渡三百餘里用車裝運計期五日可到每車可

裝穀八石計穀二十萬石需車價銀四萬三千七百五十兩自太
陽渡至西安府黨家馬頭河水平穩船隻通行水運爲便需運費
銀二萬六千兩自黨家馬頭至西安府倉二十里又需車價銀四
千兩其貯穀口袋二十萬餘條需價銀三萬兩共計銀十萬三千
七百五十兩總於豫省支銷不令陝西接運但運穀二十萬石止
得十萬之米請令豫省以二穀易一米起運則運價可省其半若
慮米難久貯請照例出陳易新應如所請得旨依議今歲河南歉
收又見往陝西齎送穀石次年穀價必致騰貴著於河南省來年
運京漕糧內照數截留補還運往陝西穀石其餘漕糧亦停止運
送京師留河南收貯○癸卯 上還京師○甲辰朝鮮國王李焞
薨世子李昀遣使奏聞兼貢方物得旨朝鮮國王李焞薨封將五
十載自來伊國從未有似此歷爵年久者且襲封以來奉藩至爲

敬謹進獻方物極盡誠款未嘗少懈又防禦伊國邊疆安靜克享
太平伊舉國老幼靡不感戴具見事上恭順撫民慈愛深爲可嘉
忽聞患病溘逝朕心不勝痛惻除遣大臣往唁外其所貢禮物著
卽交使臣帶回以示軫念之意應得卹典該部察例具奏○己酉
以牛紐爲左副都御史由郎中遷○庚戌諭戶部邇年西陲用兵師行
糧從雖芻粟悉支正供而轉輸必需民力勞苦宜恤會將康熙五
十八年陝西甘肅所屬額徵地丁銀一百八十八萬兩零歷年舊
欠銀四萬兩零康熙五十九年沿邊各州縣衛所額徵銀九萬八
千一百兩零屢沛恩綸盡行蠲免近聞二年歉收民有艱於粒食
者辦賦急公力何能支著將陝西甘肅所屬各州縣衛所除應徵
米豆草束外康熙六十年應徵地丁銀一百八十八萬三千七百
四十兩零通行蠲免爾部速行文該督撫徧行曉諭實心奉行務

俾均霑實惠又署撫花鄯奏稱甘肅地方數年歉收糧草價值騰貴兵丁採買維艱朕念兵丁效力行間勞瘁堪憫准豫給半年兵餉著卽行文附近省分撥銀三十萬兩速解甘撫頒發以副朕篤念民勞優恤軍士至意○定西將軍噶爾弼奏臣等領兵至拉里探知吹穆品爾寨桑帶領賊兵二千六百人由章米爾戎一路來拒臣等議乘其不備先取墨朱工喀於八月初四日率滿漢官兵自拉里前進隨有朱貢之胡土克圖獻地來降次日進取墨朱工喀實資第巴頭目安輯民人臣遣千總趙儒等往諭第巴達克雜來降又喇嘛鍾科爾頭目亦陸續來降臣等隨令第巴達克雜聚集皮船於八月二十二日渡河復令侍衛訥秦等率領官兵分爲三隊二十三日五鼓時起程進取西藏傳西藏之大小第巴頭目並各寺廟喇嘛聚集一處宣示 聖主拯救西藏民人至意隨將

達賴喇嘛倉庫盡行封閉西藏附近重地紮立營寨撥兵固守截
準噶爾之往來行人及運糧要路隨據三廟之坎布將各廟所有
之準噶爾喇嘛共一百一人擒獻內有爲首喇嘛五人據第巴達
克雜及三廟坎布等首告彼皆策零敦多卜授爲總督之喇嘛於
是將此五名喇嘛卽行斬首其餘九十六名準噶爾之喇嘛盡行
監禁得旨噶爾弼等遵朕指授率領官兵歷從古用兵未到之絕
域各加奮勵克取藏地將準噶爾人等信用之逆惡番僧五人正
法撫綏唐古特土伯特人民甚屬可嘉在事將軍以下兵丁以上
俱著從優議敘○甲寅戶部尙書趙申喬卒遣內大臣公振衡侍
郎張廷玉侍衛十員奠茶酒予祭葬諡恭毅○兵部尙書范時崇
以病乞休允之○乙卯撫遠大將軍允禴奏平逆將軍延信等率
領大兵於八月十五日駐紮卜克河是夜策零敦多卜等率眾來

犯擊敗之奪其馬匹器械十九日自卜克河起程二十日駐紮齊嫩郭爾三更時有賊兵二千餘人來襲我師我師嚴整備禦賊眾久持不能抵敵遂奔北二十一日自齊嫩郭爾起程二十二日駐紮綽馬喇是夜五更又有賊兵千餘劫營因營中四面哨兵槍礮矢石齊發賊兵被傷身死者甚多餘賊望風而遁延信等隨領兵於九月初八日自達穆起程送新封達賴喇嘛進藏其從前達賴喇嘛博克達不便留住藏地應發回京師得旨前遣大兵進藏議政大臣及九卿等俱稱藏地遙遠路途險惡且有瘴氣不能遠至宜固守邊疆朕以準噶爾人等見今占取藏地騷擾土伯特唐古特人民再吐魯番之人皆近雲南四川一帶邊境居住若將吐魯番侵取又鼓動土伯特唐古特人眾侵犯青海彼時既難於應援亦且不能取藏朕決意獨斷著靖逆將軍富甯安振武將軍傅爾

丹征西將軍祁里德管領兩路官兵前往策妄阿喇布坦邊境驚擾襲擊又遣定西將軍噶爾弼領雲南四川滿漢官兵由拉里前進平逆將軍延信領西路官兵由青海前進又遣大將軍總領大兵駐紮穆魯斯烏蘇調遣官兵辦理糧餉伊等俱各加奮勵兩路襲擊之兵至策妄阿喇布坦邊境屢次大勝剿殺賊兵擒獲人畜招撫數千準噶爾人眾茲覽大將軍奏延信等三次將策零敦多卜殺敗賊兵逃竄殊屬可嘉在事將軍以下兵丁以上俱著從優議敘○丁巳靖逆將軍富甯安奏今歲阿爾泰巴爾庫爾兩路官兵襲擊策妄阿喇布坦邊境將軍延信等進兵安藏各遵 皇上指授大振軍威賊人聞之心膽俱碎或因窘迫之故遣使投降詐爲緩兵之計亦未可定臣愚以爲賊性奸詭即使投降不足爲信請乘勝於來年大舉進剿查見在巴爾庫爾之兵及固原甘肅等

處豫備駐紮之兵不下一萬七千請於此內派選精兵八千名由額倫哈必爾漢一路前進六千名由吐魯番阿爾會一路前進酌帶三月口糧其設驛站之事交巡撫綽奇豫行料理又巴爾庫爾之草廠勝於各處所有安臺運米駝馬及調遣兵丁駝馬若早至巴爾庫爾牧放三月則駝馬肥壯有益軍務其來年進兵之期作何策應之處臣再與阿爾泰一路大臣會議奏聞得旨交與議政尋議政大臣議應如富甯安所奏來年大兵進剿一切軍務宜豫籌齊備至進兵時或直搗賊巢或扼據形勝須臨期相機而行其大將軍所領兵內應再派三千名添發富甯安處並行文與阿爾泰一路將軍伊等之兵作何會合前進亦令詳議奏聞得旨此事著行文允禩及富甯安傅爾丹祁里德等將來年進兵之處互相商酌詳加定議具奏○戊午戶部等衙門遵旨議覆陝省歉收速

行賑濟之事應將西安延安蘭州爲三路差大臣三員部院滿漢賢能司官十二員動戶部帑銀賑濟蘭州二十萬兩延安十五萬兩西安十五萬兩由驛遞運送散賑又會同督撫等率領地方官將陝屬常平倉存貯糧六十九萬二千石甘屬常平倉存貯糧六十七萬二千石酌量動用自散賑之日起至麥收之日銀糧兼賑至西安地方緊要米石應令多貯除見今施世綸具奏運送十萬石外將河南截留康熙六十年漕米內再撥十萬石令巡撫楊宗義運至西安存貯備用得旨此事不必差遣堂官著派出司官將銀兩交施世綸總管公同賑濟餘依議○辛酉議政大臣等議覆撫遠大將軍允禴奏八月二十三日官兵進藏後探知策零敦多卜等賊兵已自克里野一路遁去請將駐守噶斯布特爾之兵及駐防青海土兵均行撤回應如所請但策零敦多卜等性甚奸狡

雖已逃遁或乘隙侵擾青海亦未可定應令大將軍仍派兵二千駐紮於青海相近形勝之地偵探防守從之○癸亥諭大學士等科道官係從部員內揀選補授每年內升外轉並未論其原升品級一體開列今科道官內升有卽超擢至堂官者果其卓然特出雖爲布衣朕亦可不次任用況科道乎若本屬平常而不查原升品級竟一體內升超用未免越次著交與九卿將科道官由何銜升任應作何分別開列之處會議具奏尋九卿等議覆科道官內升外轉應查原升之官係郎中補授者歷俸二年員外郎補授者歷俸三年主事補授者歷俸四年然後准其開列從之○以白潢

爲兵部尙書

出戶部右侍郎遷

十一月辛未遣散秩大臣渣克亶禮部右侍郎羅瞻致祭故朝鮮國王李焞諡僖順兼冊封世子李昀爲朝鮮國王○丙子諭大學

士等朕見九卿薦舉之人有初次列名至第二次又不列名者是必因缺有美惡任意趨避也嗣後一次薦舉之人卽當每次薦舉凡某官薦舉某人著吏部註冊以備查覈○議政大臣等議覆四川總督年羹堯奏裏塘巴塘爲蜀省出兵運道奉旨聽蜀省管轄乃雲南麗江土知府木興於巴塘所屬之喇皮等處節次遣人嚇令歸滇以致番人恐懼見在四川續運之米糧雇募人夫不敢前進八月二十日木興帶領蠻兵前至喇皮因番目巴桑以已歸四川爲詞卽被殺死又示威番蠻勒令歸己以致番蠻欲圖報復各思搆兵巴塘之運路遂阻木興狂悖生釁殺良阻運請革職拏禁雲南省城俟西藏旣平嚴審究擬查平藏大兵尙未入口應將年羹堯所奏木興生釁阻運之處存案俟藏兵旋日差京城大臣一員前往審理從之○戊寅以田從典爲戶部尙書朱軾爲左都御

史屠沂爲浙江巡撫

由左副都御史遷

○辛巳諭大學士學士九卿等朕

於地理從幼留心凡古今山川名號無論邊徼遐荒必詳考圖籍
廣詢方言務得其正故遣使臣至崑崙西番諸處凡大江黃河黑
水金沙瀾滄諸水發源之地皆目擊詳求載入輿圖今大兵得藏
邊外諸番悉心歸化三藏阿里之地俱入版圖其山川名號番漢
異同當於此時考證明覈庶可傳信於後大概中國諸大水皆發
於東南諾莫渾烏巴西大幹內外其原委可得而縷晰也黃河之
源出西甯外枯爾坤山之東眾泉渙散不可勝數望之燦如列星
蒙古謂之敖敦他拉西番謂之梭羅木中華謂之星宿海是爲河
源匯爲薩陵鄂陵二澤東南行折北復東行由歸德堡積石關入
蘭州岷江之源出於黃河之西巴顏哈拉嶺七七喇哈納番名岷
尼雅克撮漢書所謂岷山在西徼外江水所出是也而禹貢導江

之處在今四川黃勝關外之乃褚山古人謂江源與河源相近禹貢岷山導江乃引其流非源也斯言實有可據其水自黃勝關流至灌縣分數十支至新津縣復合而爲一東南流至敘州府與金沙江合流金沙江之源自達賴喇嘛東北烏尼尹烏蘇峯流出烏尼尹烏蘇峯中華謂之乳牛山也其水名穆魯斯烏蘇東南流入喀木地又經中甸入雲南塔城關名金沙江至麗江府又名麗江至永北府會打衝河東流經武定府入四川界至敘州府流入岷江經夔州府入湖廣界由荊州府至武昌府與漢江合漢江源出陝西甯羌州北嶓冢山名漾東流至南鄭縣爲漢水入湖廣界東南流至漢陽縣漢口合岷江此諸水在東南諸莫渾烏巴西大幹之內源發於西番委入於中國也瀾滄江有二源一源於喀木之格爾幾雜噶爾山名雜褚河一源於濟魯肯他拉名敖毋綽河二

水會於察木多廟之南名拉克褚河流入雲南境爲瀾滄江南流至車里宣撫司名九龍江流入緬國瀾滄之西爲喀喇烏蘇卽禹貢之黑水今雲南所謂潞江也其水自達賴喇嘛東北哈拉腦兒流出東南流入喀木界又東南流入怒夷界爲怒江入雲南大塘隘更名潞江南流經永昌府潞江安撫司境入緬國潞江之西爲龍川江龍川江之源從喀木所屬春多嶺流出南流入雲南大塘隘西流爲龍川江至漢龍關入緬國此諸水在東南諾莫渾烏巴西大幹之外皆流入南海也又雲南邊境有檳榔江者其源發自阿里之岡底斯東達木朱喀巴卜山譯言馬口也有泉流出爲雅魯藏布江從南折東流經藏地過日噶公噶兒城旁合噶爾諾母倫江又南流經公布部落地入雲南古勇州爲檳榔江出鐵壁關入緬國而岡底斯之南有山名郎干喀巴卜譯言象口也有泉流

出入馬皮木達賴又流入郎噶腦兒兩河之水西流至桑南地岡底斯之北有山名僧格喀巴卜譯言獅子口也有泉流出西行亦至桑南地二水合而南行又折東行至那克拉蘇母多地與岡底斯西馬卜家喀巴卜山所出之水會馬卜家喀巴卜者譯言孔雀口也其水南行至那克拉蘇母多地會東行之水東南流至厄納忒可克國爲岡噶母倫江卽佛法所謂恒河也佛國記載魏法顯順恒河入南海至山東之渤海入口應卽此水矣梵書言四大水出於阿耨達山下有阿耨達地以今考之意卽岡底斯是唐古特稱岡底斯者猶云眾山水之根與釋典之言相合岡底斯之前有二湖連接土人相傳爲西王母瑤池意卽阿耨達池又梵書言普陀山有三一在厄納忒可克之正南海中山上有石天宮觀自在菩薩遊舍是云眞普陀一在浙江之定海縣海中爲善財第二十

入參觀音菩薩說法處一在土伯特今番名布塔拉山也亦謂觀音見身之地釋氏之書本自西域故於彼地山川亦可引以爲據也禹貢導黑水至於三危舊註以三危爲山名而不能知其所在朕今始考其實三危者猶中國之三省也打箭鎗西南達賴喇嘛所屬爲危地拉里城東南爲喀木地班禪額爾德尼所屬爲藏地合三地爲三危耳哈拉烏蘇由其地入海故曰導黑水至於三危入於南海也至於諸番名號雖與史傳不同而亦有可據者今之士伯特卽唐之突厥唐太宗時以公主下降公主供佛像於廟今番人名招招者譯言如來也其地猶有唐時中國載去佛像明成化中烏斯藏大寶法王來朝辭歸時以半駕鹵簿送之遣內監護行內監至四川邊境卽不能前進而返留其儀仗於佛廟至今往來之人多有見之此載於明實錄者爾等將山川地名詳細考明

具奏○壬午以楊名時爲雲南巡撫

由貴州布政使遷

○庚寅以隆科多

爲理藩院尙書

由步軍統領遷

○是月免陝西涇州雹災江南泰州江都

等三州縣水災額賦有差

十二月癸巳朔以張伯行爲戶部右侍郎仍兼管倉場侍郎事李

紱爲左副都御史仍兼內閣學士銜○壬寅以劉廷琛爲貴州布

政使

由廣西按察使遷

○甲辰諸王貝勒貝子公滿漢文武大臣等奏

皇上御極六十年普天大慶恭請行慶賀典禮

上諭大學士等

朕素性不喜行慶賀禮是以元旦日惟照例行禮停止筵宴雖萬

壽日亦久不行慶賀禮今王大臣等爲朕御極六十年奏請慶賀

行禮欽惟世祖章皇帝因朕幼年時未經出痘令保母護視於

紫禁城父母膝下未得一日承歡此朕六十年來抱歉之處正

月初七日世祖章皇帝忌辰二月十一日孝康章皇后忌辰

朕何敢於正月初七日二月十一日以前行慶賀禮又見在西陲

用兵地方官民運米送餉甚屬勞苦山陝二年歉收民有流離者

去歲陝省地震兵民受傷今歲沙城地震卽京城地亦微震正當

君臣憂勤求治之時何喜之有此所奏不准行○以魏廷珍爲內

閣學士

由詹事遷

○乙巳予故原任工部尙書徐元正祭葬○己酉諭

大學士等翰林官員雖多能撰擬碑碣文章者原不過數人此內

有人材不及不諳進退之禮者亦有一無所知飲酒遊戲者伊等

俱候派考試之官如此等人豈堪備用爾等同吏部翰林院查明

參革或人雖平常實有學問者不必革退或年老翰林見在修書

行走者亦不必革退又部院衙門滿漢官員內有才力不及並懶

惰者爾等亦會同部院堂官查明參革尋大學士等查翰林及各

部院官員內人材不及者少詹事龔鐸等一十八人均請革退從

之○予先賢卜商後裔世襲五經博士○壬子以原任甘肅提督師懿德爲鑾儀使○癸丑諭大學士等朕觀九卿詹事科道保舉人員並非矢公悉有所爲或有視地方優劣而舉者或有自謂屏絕交游閉戶不出而緘口不舉一人者或有自己不舉轉令他人保舉者凡此等情弊伊等以朕爲不知朕則知之甚悉也存是心者乃名教中罪人安得謂之讀書人乎如果矢志公忠則伊所舉之人一有改操之處卽宜糾參矣少詹事龔鐸保舉之人甚多伊並未外任何所見而濫行保舉此風漸不可長宜加懲究使知儆畏爾等會同吏部都察院查從前保舉人甚多而無當者悉行參奏尋大學士等查濫行保舉之員大理寺少卿成文運等五人均請革退從之○甲寅封誠親王允祉子弘晟恒親王允祺子弘昇俱爲世子○予故廣西巡撫宜思恭祭○庚申諭大學士等諸王

大臣爲朕在位六十年奏請慶賀而於典禮之大者並未議及朕在位六十年皆 祖宗積德廕佑所致幸而六十年來一無所失應先往盛京 三陵行大祭典禮但朕今年近七旬不能親謁三陵應遣阿哥等恭代告祭俟上元節後朕親往 孝陵恭行大祭典禮爾滿漢大臣會議具奏其祭 陵撰文卽將朕旨纂入○議政大臣等議覆振武將軍傅爾丹等奏明年大兵進剿請借支官兵一年俸餉銀共二十六萬三千四百餘兩於每季每月將所借之銀照數扣補還項應如所請得旨軍興時需用錢糧甚多爾等於傅爾丹奏請之處應相度機宜詳覈定議明年果否進兵及官兵之馬匹器械會否齊備糧餉作何運送將軍等並未奏聞爾等亦未議及止議借支餉銀儻明年不進兵至後年進兵將再借乎否乎從前運到軍前之米及種地所收之糧果否足用又各官

自備牛種交收之糧或係空名亦未可定官兵惟以借餉爲事不思借無底止則錢糧易至匱乏矣如聽信兵丁之言豫期借餉又傲倖明年撤兵或謂功成之日必邀恩免此豈將兵之道乎爾等不加詳覈罷輒從議亦屬不合軍務本無年限必詳加籌度使糧無匱乏乃於軍務有益此本著再議具奏尋議傅爾丹奏請借支一年俸餉不便卽給應行文大將軍等會議明年應否進兵及傅爾丹一路官兵應否借支之處一併奏明再議從之○是月免直隸延慶宣化等五州縣地震額賦○是歲朝鮮琉球來貢○人丁戶口二千四百七十二萬四百四又永不加賦滋生人丁三十萬九千五百四十五田地山蕩畦地七百二十六萬八千一百二十二頃五十畝有奇徵銀二千九百八十三萬一千八百九十二兩有奇米豆麥六百九十萬二千三百五十三石有奇草四百五萬

五千三百二十束茶二十九萬五千五百六十引行鹽五百一十一萬四千五百三十五引徵課銀三百七十七萬二千三百五十五兩有奇鑄錢四萬三千七百三十二萬五千八百有奇